



REGIONE AUTÒNOMA DE SARDIGNA

LEGE REGIONALE 7 MARTZU 2007

Lege istatutària de sa Regione Autònoma de Sardigna

Tìtulu 1

Ogetu de sa lege

Art. 1

Ogetu

1. Custa lege, in atuatzione de s'artìculu 15, comma segundu, de sa Lege Costituzionale 26 freàrgiu 1948, n. 3 (Istatutu Ispetziale pro sa Sardigna), disciplinat sa forma de governu e sos raportos intre sos òrganos, sos printzìpios fundamentales de organizatzione e de funtzionamentu de sa Regione, s'esertzìtiu de su deretu de iniziativa legislativa popolare e sos referendum regionales, sos casos de inelegibilidade e incumpatibilidade a sa càrriga de Presidente de sa Regione, consigieri e assessore regionale.

Tìtulu II

Partetzipatzione popolare

Cabu I

Referendum

Art. 2.

Disponimentos generales

1. Tenent deretu de partetzipare a sas consultatziones referendàrias totu sos tzitadinos iscritos in sas listas eletorales de sas comunas de sa Regione.



2. Sa proposta sutaposta a referendum est aprovada si a sa consultatzione partètzipata a su mancu sa metade prus unu de sos eletores chi ant leadu parte a sas eletziones pro su Consìgiu Regionale in sa legisladura in sa cale si faghet su referendum, e in su casu de su referendum consultivu, nessi su de tres unu de sos eletores. Sa proposta sutaposta a referendum est aprovada si si lòmpet a sa majoria de sos votos espressados a manera v`alida.
3. Non podet èssere convocadu perunu referendum si non sunt colados nessi ses meses dae sa data de sas ùrtimas eletziones e si mancat prus pagu de ses meses a las f`aghene.
4. In casu de sessada antetzipada de su Consìgiu regionale sa consultatzione chi pertocat a referendum giai convocados est rinviada in manera de garantire su respetu de su tèrmine prevìdidu dae su comma 3.
5. Sa matessi pregunta referend`aria non podet èssere torrada a prop`onnere in antis de chimbe annos.
6. Su referendum subra sas leges aprovadas in cunforma a s'artìculu 15, comma segundu, de s'Istatutu ispetziale (dae como a in antis leges istatut`arias), est ammìtidu in sas formas e cun sos l`imites prevìdidos dae s'Istatutu ispetziale. Sa lege regionale nde disciplinat sas modalidades de acumprimentu.

Art. 3

Referendum abrogativu

1. Bindighi m`igia eletores o bator consìgios provintziales chi rapresentent nessi su chimbanta pro chentu de sa populatzione regionale podent rechèdere su referendum pro s'abrogatzione totale o partziale de una lege, de unu regulamentu o de un'atu de programmatzione o pianificatzione generale de sa Regione.



2. S'abrogatzione totale o partziale de sas leges, de sos regulamentos, de sos atos de programmatzione o pianificatzione generale sutapostos a referendum est decrarada cun decretu de su Presidente de sa Regione, de emìtere intro chimbe dies dae sa proclamatzione de sos resurtados de sa consultatzione elettorale. S'abrogatzione leat efetu dae sa die in fatu a cussa de publicatzione de su decretu.

3. No est ammitidu su referendum abrogativu subra sas leges istatutàrias, subra sas leges tributàrias e de bilàntziu, subra sas leges e sos regulamentos de atuatzione de sa normativa comunitària de sa cale a s'artìculu 117, comma 5, de sa Costituzione o de esecutzione de acordos e intesas internatzionales de sa Regione in cunforma a s'artìculu 117, ùrtimu comma, de sa Costituzione, e subra sas leges e sos regulamentos chi pertocant s'ordinamentu de sos òrganos istatutàrios e de sos ufizios regionales.

Art. 4

Referendum propositivu

1. Bìndighi mìgia eletores podent presentare una proposta de lege regionale a tales chi siat sutaposta a referendum popolare in cunforma a custu artìculu.

2. Sa proposta est presentada a su Consìgiu regionale. Sa proposta depet cuntènnere una relata incraridora e s'indicu ispetzìficu de sos inditos pro sa disciplina de sa matèria, non podet èssere presentada in sos ses meses in antis de s'iscadèntzia de su Consìgiu e in antis chi siant colados ses meses dae sa data de sas eletziones regionales.

3. Colados ses meses dae s'atu de averiguamentu de s'ammissibilitàde de sa rechesta, s'in casu mai su Consìgiu regionale no apat deliberadu a manera definitiva subra sa proposta, su Presidente de sa Regione cònvocat su referendum.

4. In casu de resurtu in favore, su Consìgiu regionale est obligadu a deliberare intro de ses meses. Coladu custu tèrmine, su Presidente de su Consìgiu iscriet



in ogni casu sa proposta in s'òrdine de sos traballos pro sa die de s'Assemblea, chi l' esàminat in sa prima setziada.

5. Su referendum propositivu no est ammìtidu in sas matèrias de cumpetèntzia de s'Istatutu Ispetziale e de sas leges istatutàrias, in matèria tributària e de bilàntziu, in cussas pro sas cales est prevididu s'òbrigu de atuatzione de sa normativa comunitària o chi pertocant a s'esecuzione de acordos o intesas internatzionales de sa Regione, in matèria de ordinamentu de sos òrganos istatutàrios regionales e de sos ufizios regionales.

Art. 5

Referendum consultivu

1. Bìndighi mìa eletores podent presentare una rechesta de referendum consultivu subra chistiones de interessu generale. In custu casu su referendum est vàlidu si partèzipat a su mancu su de bator unu de sos eletores. Sa lege ordinària de sa Regione podet disciplinare finas formas de referendum locales, limitados in su territòriu.

2. Podent in prus rechèdere sa convocatzione de una consultatzione popolare consultiva subra chistiones de interessu generale inclùidas sas initziativas regionales de leges istatales finas costitutzionales:

a) su Consìgiu regionale, cun deliberatzione sua;

b) su de tres unu de sos consigeris regionales.

3. Su referendum consultivu e sa consultatzione popolare consultiva non sunt ammìtidos in argumentu de leges tributàrias e de bilàntziu, de leges e de regulamentos de atuatzione de sa normativa comunitària adotados in cunforma a s'artìculu 117, su de chimbe commas, de sa Costituzione e de esecuzione de acordos e intesas internatzionales de sa Regione in cunforma a s'artìculu 117, ùrtimu comma, de sa Costituzione, de s'ordinamentu de sos òrganos istatutàrios e de sos ufizios regionales.



Art. 6

Ammissibilidade de sos referendum

1. S'ammissibilidade de sos referendum est apostivigada dae sa Consulta de garantia mentovada in s'articulu 34, sa cale tenet s'òbrigu de s'expressare subra sa proposta intro trinta dies dae sa presentazione. Sa Consulta detzidit subra sa regularidade de sos referendum intro trinta dies dae su depòsitu de sas firmas collidas e de sos àteros acumprimentos rechestos dae sa lege regionale.

Art. 7

Disciplina de sos referendum

1. Sa lege regionale disciplinat su protzedimentu e sas modalidades de atuatzione de sos referendum.

Tìtulu III

Forma de Guvernu de sa Regione

Cabu I

Disponimentos generales

Art. 8

Règulas e doveres de s'atividade polìtica

1. In sa prima setziada a pustis de sas eletziones su Presidente de sa Regione e sos consigeris regionales giurant cun sa fòrmula chi s'ghit: <Giuro de èssere fidele a sa Costituzione e a s'Istatutu, de esertzare s'ufitziu meu pro s'iscopu ùnicu de su bene inseparàbile de s'Istadu e de sa Regione in



s'interessu generale de su pòpulu sardu>. Sos assessores giurant cun sa matessi fòrmula in sa prima setziada imbeniente a sa discussione subra su programma politicu de governu.

2. Sa lege apostìvigat sas modalidades cun sas cales su Presidente, consigeris e assessores sunt obligados a comunicare a su Consìgiu regionale sos deretos de proprietade, sos rèditos, sas partetzipatziones e sas càrrigas chi bi podent èssere de amministradore o s'indigu in sotziedades, ma finas sòtzios, de cale si siat creze, de sas cales faghent parte, de gastos fatos o de obligatziones pigadas pro sa propaganda elettorale.

3. Non si podet torrare a elègere su Presidente de sa Regione a manera immediata a s'iscadèntzia de su segundu mandadu.

Art. 9

Controllu de su gastu

1. Sa Regione e sos entes, agentzias, aziendas regionales persighint su rigore de su gastu pro su funtzionamentu e pro s'acumprimentu de s'atzione amministrativa issoro.

2. Sunt disciplinadas, subra sa base de previsiones de lege, formas adeguadas de controllu e valutatzione de su gastu.

3. Sos contributos e sos cumpensos a cale si siat tìtulu erogados dae sa Regione, dae sos entes, agentzias e aziendas regionales, sunt publitzizados tràmite mèdios de informatzione de atzessu fàtzile in su rispetu de sa normativa in matèria de tutela de sas persones in relatzione a su tratamentu de sos datos sensìbiles.

Cabu II

Consìgiu regionale



Art. 10

Consìgiu regionale

1. Su Consìgiu regionale est cumpostu dae otanta consigeris eletos a sufràgiu universale e deretu. Su Presidente de sa Regione nde faghet parte. Cun lege regionale aprovada in cunforma a s'artìculu 15, comma segundu, de s'Istatutu ispetziale est apostivigadu su sistema elettorale subra sa base de printzìpios de rapresentatividade e istabilidade.
2. Su Consìgiu regionale est eletu pro chimbe annos a decùrrere dae sa data de sas eletziones.
3. Sas eletziones de su Consìgiu nou sunt convocadas dae su Presidente de sa Regione e podent àere logu a decùrrere dae sa de bator domìnigas pretzedentes e no ultres sa segunda domìniga imbeniente a su cumprimentu de su perìodu de su cale a su comma 2. Su decretu de convocatzione depet èssere publicadu no ultres sa de barantachimbe dies antetzedentes sa data apostivigada pro sa votatzione.
4. In casu de fine antetzipada de sa legisladura sas eletziones si faghent intro sessanta dies dae sa data de sa sessada de su Consìgiu.
5. Su Consìgiu nou si riunit intro binti dies dae sa proclamatzione de sos eletos, tràmite convocatzione de su Presidente de sa Regione proclamadu eletu.
6. Su sistema elettorale pro s'elezione de su Consìgiu regionale e de su Presidente de sa Regione garantit sa rapresentàntzia consiliare a cadauna provìntzia de Sardigna in sas formas apostivigadas dae sa lege. A fines de consighire s'echilibriu de sa rapresentàntzia de sos gèneres, sa lege elettorale promovet cun measuras adeguadas, cunditziones de paridade pro s'atzessu a sas càrrigas eletivas.



7. Su Consìgiu regionale tenet autonomia organizativa, funtzionale, finanziària e contàbile, in cunformidade a su Regulamentu internu adotadu a majoria assoluta de sos cumponentes suos.

Art. 11

Funtziones de su Consìgiu regionale

1. Su Consìgiu regionale est òrganu rapresentativu de su pòpulu sardu. Esèrtzitat funtziones legislativas e regulamentares, de inditu polìticu, de controllu e de vigilàntzia de sos òrganos de governu e subra s'amministratzione regionale.

2. Su Consìgiu regionale esèrtzitat sas funtziones legislativas e regulamentares atribuidas a sa Regione dae sa Costituzione e dae s'Istatutu Ispetziale.

3. In particolare su Consìgiu regionale:

- a) discutit su programma polìticu de governu e nde verìficat s'atuatzione;
- b) aprovat sos bilàntzios, sos rendicontos, sos atos generales de programmatzione e cussos de pianificatzione non delegados a sa Giunta dae sa lege e dae sas variatziones issoro;
- c) autorizat, cun provvedimenti legislativos, sa costituzione o sa sopressione e sa licuidatzione de entes, agentzias, de àteros sugetos giurìdicos delegados a esertzare funtziones regionales;
- d) aprovat sos atos de inditu generale prevìdidos dae sa normativa comunitària;
- e) aprovat sos regolamentos delegados a sa Regione dae leges de s'Istadu in cunforma a s'artìculu 117, su de ses commas, de sa Costituzione;
- f) ratìficat sos acordos congruidos dae sa Regione cun òrganos de s'Istadu, in sos casos in sos cales cumportent variatziones a sos atos de programmatzione o pianificatzione de sos cales a sa lìtera b);
- g) elàborat documentos de inditu in matèria de raportos internatzionales e ratìficat sos acordos congruidos dae sa Regione cun àteros istados e sas



intesas cun entes territoriales internos a issos matessi, in sos casos, in sos limites e cun sas formas de sos cales a s'artìculu 117 de sa Costituzione.

4. Su Consìgiu regionale esèrtzitat sas àteras funtziones atribuidas a issu dae sa Costituzione, dae s'Istatutu ispetziale, dae custa lege e, in cunformidade a custos matessi, dae sas leges.

Art. 12

Nòminas

1. Su Consìgiu deliberat sas nòminas e sas eletziones chi sunt atribuidas a manera espressa a s'Assemblea; cussas chi apostìvigant s'òbrigu de assicurare sa rapresentàntzia de sas opositziones; sas chi pertocant a organismos de garantzia.

2. Sas nòminas de cumpetèntzia de sos òrganos de governu chi pertocant a sos presidentes de sos entes regionales, a sos responsàbiles de sas istruturas de diretzione de s'amministratzione regionale, a sos diretores generales de sas agentzias e de sas aziendas sanitàrias regionales, sunt sutapostas a su parre de sas commissiones consiliares cumpetentes. Sas commissiones podent protzedire a s'auditzione de su nominadu.

3. Su parre est espressadu, in su tempus chi intercurret intre s'atu de nòmina e s'eficatzidade sua, intro deghe dies, e, coladas chi siant de badas custas, non si leat a cussideru.

Art.13

Controllu de s'atuatzione de sas leges e valutatzione de sos efetos de sas políticas regionales.

1. Su Consìgiu regionale esèrtzitat su controllu subra s'atuatzione de sas leges e promovet sa valutatzione de sos efetos de sas políticas regionales, a fines de nde verificare sos resurtados.



2. Cando sa lege previdit clàusolas valutativas, sos sugetos atuadores de sa lege sunt obrigados a produrre sas informatziones netzessàrias in sos tempos e cun sas modalidades prevìdidas dae sa lege matessi e a frunire sa collaboratzione issoro a fines de un'esertzìtziu prenu de su controllu e de sa valutatzione.

3. Su Consìgiu regionale, cun sas modalidades prevìdidas dae su Regulamentu internu, podet, a manera indipendente dae sa previsionu pro lege de clàusolas valutativas, pigare initziativas finalizadas a s'anàlisi de s'atuatzione de una lege o de sos efetos de una polìtica regionale. Est assegurada sa divulgatzione de sos resurtados de su controllu e de sa valutatzione.

Art. 14

Deretu a s'informatzione de su consigieri

1. Ogni consigieri, fatu chi apat rechesta iscrita, intro bìndighi dies, tenet deretu a otènnere dae su Presidente de sa Regione, dae sa Giunta regionale, dae sos òrganos e dae cada ufiziu regionale, dae entes, agentzias, aziendas e istitutos regionales còpia de sos atos e totu sas informatziones e sa documentatzione ùtile a s'esertzìtziu de su mandadu, sena òbrigu de motivatzione e in su rispetu de sas normas a tutela de su cunfidu cun òbrigu de mantènnere su segretu in sos casos prevìdidos dae sa lege.

Art. 15

Suportos a esertzitare sas funtziones consiliares

1. Pro cantu pertocat a s'autonomia prevìdida dae s'artìculu 10, comma 7, su Consìgiu regionale si frunit de istruturas e ufizios adeguados a s'esertzìtziu prenu de totu sas funtziones atribuidas a issu.



2. Sa Giunta regionale subra rechesta de su Consìgiu, aparitzat relatas tènicas de suportu pro s'esàmene de sos atos sutapostos a issu etotu e ponet a disponimentu totu sos documentos, datos e elementos de valutazione ùtiles.

Art. 16

Garanzias de sas minorias e controllu consiliare

1. Su Regulamentu internu de su Consìgiu regionale assegurat sas garànzias de sas minorias consiliares e nde disciplinat sas modalidades e sos istrumentos de esertzìtziu, finas cun s'aprovu de un'Istatutu ispetzìficu de sas opositziones.

2. Su Regulamentu internu, in particolare, apostìvigat sas garanzias de sas opositziones in relatzione:

- a) a sos tempos de traballu de su Consìgiu pro s'acumprimentu de s'atividade legislativa e de su sindacadu de controllu;
- b) a sa partetzipatzione in sas delegatziones e in sas ocasiones de rapresentàntzia de su Consìgiu;
- c) a s'ativatzione de istrumentos chi cunsentant una comunicatzione finas esterna e un'informatzione completa e fata a tempus suo pretzisu;
- d) a s'atribuzione de sas presidèntzias e a su funtzionamentu de sas commissiones de vigilàntzia.

Cabu III

Presidente de sa Regione

Art. 17

Presidente de sa Regione



1. Su Presidente de sa Regione est eletu a sufràgiu universale deretu e leat sas funtziones a s'atu de sa proclamatzione.

Art. 18

Funtziones de su Presidente de sa Regione

1. Su Presidente de sa Regione:

- a) rapresentat sa Regione
- b) dirigit sa polìtica generale de sa Giunta e nd'est responsàbile, mantenet s'unidade de inditu polìticu e amministrativu promovende e coordinende s'atividade de sos assessores;
- c) nòminat e rèveocat sos assessores e nd'atribuit sos incàrrigos; atribuit a unu de sos assessores, chi lu sostituit in casu de ausèntzia, de impedimentu e in totu sos casos prevìdidos dae sa lege, sas funtziones de Visupresidente; custas determinatziones sunt comunicadas a su Consìgiu in sa prima setziada; in sa matessi setziada su Presidente comùnìcat su programma de legisladura;
- d) providet a sa nòmina de sos rapresentantes de sa Regione in entes, aziendas, agenzias e istitutziones, de sos cales sa lege l'atribuit sa cumpetèntzia.
- e) a s'iscadire de sa mesidade de sa legisladura presentat a su Consìgiu regionale una relata subra s'istadu de atuatzione de su programma e subra sas initziativas chi cheret printziare; su Consìgiu regionale, segundu sas normas de su Regulamentu internu suo, dibatit sa relata e si in casu mai deliberat subra issa;
- f) cònvocat sas consultatziones pro su rennou de sos òrganos regionales;
- g) promulgat sas leges e emitet sos regolamentos regionales;
- h) at sa responsabilidade de sos raportos cun sos àteros livellos istituzionales natzionales, comunitàrios e internatzionales;
- i) incurat sas funtziones istratègicas e trasversales de s'amministratzione regionale: sa programmatzione e sas polìticas comunitàrias e internatzionales, su coordinamentu de s'atividade giurìdica e normativa de sa Regione, s'organizatzione e sas resursas umanas e sa comunicatzione istituzionale. S'ordinamentu, s'organizatzione e sas modalidades de dèlega chi bi podet



èssere de sas funtziones subra mentovadas a sos assessores sunt definidas dae sa lege.

2. Su Presidente de sa Regione pro su cunsighimentu de obietivos ispetzìficos, o pro pònnere in òpera progetos ispetzìficos, podet cun decretu suo nominare finas a duos delegados suos, sos còmptos de sos cales e sa dura de sos cales sunt apostivados in s'atu de nòmina subra sa base de previsiones de lege.

Cabu IV

Giunta regionale

Art.19

Giunta e assessores regionales

1. Sa Giunta est cumposta dae su Presidente de sa Regione, chi la presedit, e dae non prus pagu de oto e non prus de deghe assessores. S'incàrrigu de assessore est incumpatibile cun cussu de consigieri regionale.

2. Sas setziadas de sa Giunta non sunt pùblicas, foras de detzisione diferente de custa matessi. De sos atos de sa Giunta benit dada comunicatzione tràmite bia telemàtica intro sa die in fatu a cussa de s'adotzione issoro.

3. In atuatzione de su printzìpiu de sas oportunitades uguals intre fèminas e òmines, sa cumposizione de sa Giunta regionale est determinada promovende sa presèntzia parìvile de ambos sos gèneres, ognunu de sos cales depet semper e cando èssere rapresentadu nessi in sa misura de su 40 pro chentu de sos cumponentes.

4. A su Presidente e a sos assessores sunt dados indennidades e tratamentu econòmicu apostivados dae sa lege regionale.

Art. 20



Funtziones de sa Giunta Regionale

1. Sa lege apostìvigat su nùmeru, s'articolatzione, sas cumpetènzias e finas s'organizatzione generale de sos assessorados.

2. Sa Giunta regionale:

- a) àtuat su programma de governu subra sa base de sos inditos e de su coordinamentu de su Presidente;
- b) adotat sos disinnos de lege e sos àteros atos de presentare a su Consìgiu;
- c) aprovat su regulamentu chi disciplinat s'organizatzione interna sua e su funtzionamentu suo;
- d) delìberat sos documentos de sa programmatzione econòmica e finantziària e su rendicontu generale e los proponet a su Consìgiu pro s'aprovu;
- e) delìberat sos recursos a sa Corte Costituzionale;
- f) adotat sos àteros atos atribuidos dae sa lege a sa cumpetènzia sua;
- g) esèrtzitat sas funtziones de amministratzione arta chi non siant a manera espressa atribuidas a su Consìgiu o a su Presidente de sa Regione.

3. Sos assessores, in su rispetu de sos atos de diretzione polìtica generale de su Presidente, acumprint a manera autònoma sos incàrrigos atribuidos a cadaunu. Sunt responsàbiles a manera collegiale de sos atos de sa Giunta e a manera individuale de sos inditos e de sos atos chi adotant in s'esertzìtiu de sos poderes de diretzione polìtica e amministrativa de sos assessorados a sos cales sunt prepostos.

Art. 21

Diretzione polìtica e diretzione amministrativa

1. Su Presidente, sa Giunta e sos assessores, in calidade de òrganos de diretzione polìtica, cadaunu segundu sas cumpetènzias suas, tràmite direttivas generales e atos de inditu, indicant obietivos, prioridades, programmas e critèrios de ghia a sos òrganos de diretzione amministrativa, chi provident a s'atuatzione.



2. Su raportu intre diretzione política e diretzione amministrativa est cunformadu a su printzìpiu de collaboratzione màssima e leale, in sa distintzione de sas funtziones e de sas responsabilidades.

Cabu V

Raportos intre Consìgiu regionale, Presidente de sa Regione e Giunta

Art. 22

Motzione de discunfiàntzia

1. Su Consìgiu regionale podet espressare sa discunfiàntzia cara a su Presidente de sa Regione cun motzione motivada, sutascrita dae nessi su de chimbe unu de sos cumponentes suos e aprovada pro apellu nominale a majoria assoluta de sos consigeris regionales. Sa motzione non podet èssere posta in discussione in antis de binti dies e depet èssere votada no ultres trinta dies dae cando est presentada.
2. Su votu de su Consìgiu regionale contras a una proposta de su Presidente de sa Regione non dat logu a s'òbrigu de dimissiones de custu ùrtimu.
3. S'aprovu de sa motzione de discunfiàntzia cara a su Presidente de sa Regione e finas sas dimissiones cuntestuales de sa majoria de sos cumponentes de su Consìgiu regionale dant logu a sa sessada de su Consìgiu e a sa convocatzione de eletziones noas de su Consìgiu regionale e de su Presidente de sa Regione. Su Presidente e sa Giunta abarrant in càrriga pro s'amministratzione ordinària finas a sa proclamatzione de su Presidente de sa Regione nou.
4. Sas dimissiones voluntàrias de su Presidente de sa Regione cajonant sa sessada de su Consìgiu e sa convocatzione de eletziones noas. In custu casu sas funtziones de Presidente sunt leadas dae su Visupresidente chi las esèrtzitat finas a sa proclamatzione de su Presidente de sa Regione nou a dae chi sunt fatas sas eletziones noas.



5. Sas dimissiones de su Presidente sunt presentadas a su Presidente de su Consìgiu regionale e divenint eficatzes trinta dies a pustis de sa presentazione. Intro custa data podent èssere retiradas. Custas sunt discutidas in una setziada dedicata de su Consìgiu convocada in una data cumpresa intre sas binti e trinta dies coladas dae sa presentazione.

Art. 23

Mozione de tzensura individuale

1. Su Consìgiu regionale podet esprimere tzensura cara a un'assessore, tràmite mozione motivada, sutascrita dae a su mancu su de chimbe unu de sos cumponentes suos e aprovada cun apellu nominale.
2. Sa mozione non podet èssere posta in discussione in antis de deghe dies e depet èssere votada no ultres binti dies dae sa presentada sua.
3. Su Presidente de sa Regione comùnicat intro binti dies a su Consìgiu sas detzisiones motivadas suas chi cunsighint a s'aprovu de sa mozione de tzensura.

Cabu VI

Inelegibilidade e incumpatibilidade

Art. 24

Càusas de inelegibilidade a sa càrriga de Presidente de sa Regione

1. Non podent èssere eletos Presidente de sa Regione:
 - a) su Presidente de su Consìgiu de sos Ministros, sos ministros, sos visuministros e sos sutasegretàrios de istadu;



- b) sos dirigentes generales de s'Istadu e sos diretores generales de sa Regione, sos diretores generales de agenzias de s'Istadu e de sa Regione;
- c) sos presidentes e sos diretores generales de entes, istitutos, cunsòrtzios o aziendas regionales;
- d) sos presidentes, sos amministradores delegados, sos diretores generales e semper e cando sos rapresentantes legales de sotziedades de capitales controlladas dae sa Regione;
- e) sos dirigentes e sos ufiziales generales de sas fortzas de politzia; sos dirigentes e sos ufiziales superiores de sas fortzas de politzia chi òperant in Sardigna;
- f) sos prefetos de sa Repùblica chi òperant in Sardigna;
- g) sos ufiziales generales de sas fortzas armadas chi òperant in Sardigna;
- h) sos magistrados prepostos a sas cortes de apellu, a sos tribunales e a su tribunale amministrativu regionale cun cumpetèntzia subra sa Sardigna.

2. Sas càusas de inelegibilidade prevididas dae su comma 1 no ant efetu si s'interessadu sessat dae sas funtziones pro dimissiones, trasferimentu, rèveoca de s'incàrrigu o de su cumandu, collocamentu in aspetativa, no ultres chentu e otanta dies in antis de sa data de iscadèntzia de sa legisladura regionale.

3. In casu de sessada antetzipada de sa legisladura, chi ruat in antis de chentu e otanta dies antetzedentes s'iscadèntzia naturale, sas càusas de inelegibilidade no ant efetu si sas funtziones siant sessadas intro sas sete dies imbenientes a sa data de su provedimentu de sessada de su Consìgiu regionale.

4. S'amministratzione pùblica est obrigada a adotare sos provedimentos de sos cales a su comma 2 intro 5 dies dae sa rechesta. Si in casu mai s'amministratzione non providat, sa dimanda de dimissiones o aspetativa, acumpangiada dae sa sessada efetiva de sas funtziones, tenet efetu dae sa de chimbe dies imbenientes a sa presentada.

5. Sa sessada de sas funtziones cumportat s'astensione efetiva de onni atu chi pertocat a s'ufitziu assuntu.

Art. 25



Càusas de inelegibilidade de sos consigeris

1. Non podent èssere eletos consigeris regionales:

- a) su Presidente de su Consìgiu de sos Ministros, sos ministros, sos visu-ministros e sos sutasegretàrios de istadu;
- b) sos presidentes de sas provìntzias e sos sùndigos de sas comunas cabu de logu de provìntzia o cun populatzione prus manna de 15.000 abitanetes;
- c) sos dirigentes generales de s'Istadu e sos diretores generales de sa Regione, sos diretores generales de agenzias de s'Istadu e de sa Regione ;
- d) sos presidentes e sos diretores generales de entes, istitutos, consòrtzios o aziendas regionales ;
- e) sos presidentes, sos amministradores delegados, sos diretores generales e semper e cando sos rapresentantes legales de sotziedades de capitales controlladas dae sa Regione.
- f) sos dirigentes e sos ufiziales generales de sas fortzas de politzia; sos dirigentes e sos ufiziales superiores de sas fortzas de politzia chi òperant in Sardigna; sos funtzionàrios, sos dirigentes e sos ufiziales de sas fortzas de politzia in sos collègios eletorales in sos cales siat includidu in totu o in parte su territòriu de cumpetèntzia;
- g) sos prefetos de sa Repùblica e sos visu prefetos chi òperant in Sardigna;
- h) sos ufiziales generales de sas fortzas armadas chi òperant in Sardigna;
- i) sos magistrados prepostos a sas cortes de apellu, a sos tribunales e a su tribunale amministrativu regionale cun cumpetèntzia subra sa Sardigna; sos magistrados de sas setziones de s'ufitziu de su Pùblicu Ministeru de sa Corte de sos Contos cun cumpetèntzia subra sa Sardigna; sos magistrados onoràrios in sos collègios eletorales in sos cales siat includida in totu o in parte sa giurisdizione de cumpetèntzia.
- l) sos diretores generales, sos diretores amministrativos e sos diretores sanitàrios de sas aziendas sanitàrias e ospedalieras in sos collègios eletorales in sos cales siat includida in totu o in parte su territòriu de s'azienda in ue issos esèrtzitant sas funtziones issoro.

2. Sas càusas de inelegibilidade de sas cales a su comma 1, lìteras a), c), d), e), f), g), h), i) e l), non tenent efetu si s'interessadu sessat dae sas funtziones pro more de dimissiones, trasferimentu, rèveoca de s'incàrrigu o de su



cumandu, collocamentu in aspetativa a su mancu chentu e otanta dies in antis de sa data de iscadèntzia de sa legisladura regionale; pro sos presidentes de provìntzia e pro sos s'indigos de sos cales a sa lìtera b), non tenent efetu si sos interessados sessant dae sa càrriga barantachimbe dies in antis de sa data de iscadèntzia de sa legisladura regionale.

3. In casu de sessada antetzipada de sa legisladura, sas càusas de inelegibilidade no ant efetu si sas funtziones siant sessadas intro sas sete dies imbenientes a sa data de su provedimentu de sessada de su Consìgiu regionale.

4. S'aplicant sos commas 4 e 5 de s'artìculu 24.

Art. 26

Càusas de incumpatibilidade

1. Non podent leare sa càrriga de Presidente de sa Regione, de assessore regionale e de consiglieri regionale:

a) sos assessores de provìntzias e sos s'indigos de comunas subra sos tres mìgia abitanes;

b) sos cumponentes de sas commissiones tributàrias e sos giùighes de paghe chi esèrtzient sas funtziones issoro in Sardigna;

c) sos presidentes, sos amministradores, sos rapresentantes legales de sotziedades de capitales, entes, istitutos finas de crèditu, aziendas de sas cales sas nòminas o designatziones siant de cumpetèntzia de sa Regione o de òrganos suos o de entes regionales;

d) cussos chi esèrtziant su patrotzìniu professionale o donant assitèntzia o consulèntzia in cale si siat forma a impresas, entes e assòtzios in sos raportos contratuales o precontratuales issoro cun sa Regione o cun sos entes regionales;

e) cussos chi ant pretu pendente in cantu parte de unu protzedimentu tzivile o amministrativu cun sa Regione o cun entes, istitutos, agenzias, consòrtzios o aziendas regionales; s'esistèntzia de unu pretu in matèria tributària non cajonat incumpatibilidade;



- f) cussos chi, pro fatos cumpridos cando fiant amministradores o impiegados de sa Regione, o de ente, istitutu, agenzia o azienda regionale, sunt istados, cun sentèntzia colada in giudicadu, decrarados responsàbiles cara a sa Regione o cara a s'ente, s'istitutu, s'agenzia o s'azienda, e no ant galu chitidu su dèpidu;
- g) cussos chi, sende chi ant unu dèpidu lìcuidu e esigibile, cun sa Regione o cun entes, istitutu, azienda o agenzia regionale, sunt istados a manera legale postos in mora o, sende chi ant unu dèpidu lìcuidu e esigibile pro impostas, tassas e tributos cun custos entes, apant retzidu de badas notificatzione de sa cartella de pagamentu dae banda de su contzessionàriu de sa riscossione;
- h) cussos chi no ant torradu su contu finantziàriu o de amministrazione de una gestione chi pertocat sa Regione o ente, istitutu, agenzia, consòrtziu o azienda regionale;
- i) sos rapresentantes legales, sos proprietàrios e sòtzios de controllu de sotziedades o de impresas privadas chi resurtent vinculadas cun sa Regione o òrganos suos pro cuntratu de òperas o de somministratziones de benes o servìtzios o pro cuntzessiones o autorizatziones amministrativas ultres su lìmite de unu millione de èuros de faturadu a s'annu.

2. Costituint in prus conditziones de incumpatibilidade cun sa càrriga de assessore sas càusas de inelegibilidade prevìdidas dae sos artìculos 24 e 25.

3. Sas ipòtesis de sas cales a sas lèteras e) e h) de su comma 1 non s'aplicant a sos amministradores e a sos consigeris regionales pro fatu connessu cun s'esertzìtziu de su mandadu.

4. Non costituint càusas de incumpatibilidade sos incàrrigos cunferidos o sas funtziones cunferidas a sos amministradores de sa Regione in virtude de una norma de lege, istatutu o regulamentu in connessione cun su mandadu eletivu.

5. Sas càusas de incumpatibilidade prevìdidas dae custu artìculu e dae s'artìculu 27, siat chi esistat a su momentu de s'eletzione siat chi subravèngiant a issa, e sas càusas de inelegibilidade de sas cales a sos artìculos 24 e 25 subravènnidas a sas eletziones cumportant sa decadèntzia dae sa càrriga segundu su protzedimentu indicadu in sos commas afatantes.



6. Cando esistat a su momentu de s'elezione, o si verifichet posca, calicuna de sas conditziones de incumpatibilidade o subravèngiat una càusa de inelegibilidade prevìdida dae custa lege e dae s'artìculu 17 de s'Istatutu Ispetziale, est cuntestada a su Presidente de sa Regione o a su consigieri regionale dae su Consìgiu regionale; a s'assessore dae sa Consulta de garantia de sa cale a s'artìculu 34.

7. S'interessadu tenet deghe dies de tempus pro formulare osservatziones o pro eliminare sas càusas de incumpatibilidade o inelegibilidade subravènnidas.

8. Intro sas deghe dies imbenientes a s'iscadèntzia de su tèrmine de su cale a su comma 7 s'òrganu regionale deliberat a manera definitiva e, in ue aprètziet sussistente sa càusa de incumpatibilidade o de inelegibilidade subravènnida, invitat s'interessadu a nche la mòere o a esprimere s'optzione pro sa càrriga chi bolet mantènnere.

9. Si in casu mai s'interessadu non bi providat in sas deghe dies imbenientes, s'òrganu regionale lu decrarat decàdidu. Contrastu a sa deliberatzione adotada dae issu est ammittidu ricursu giurisditzionale.

10. Sa deliberatzione depet èssere, sa die in fatu, depositada in sa segreteria de s'òrganu regionale, e notificada, intro sas chimbe dies imbenientes, a chie est istadu decraradu decàdidu.

11. Sas deliberatziones de sas cales a custu artìculu sunt adotadas de ufitziu o tràmite istàntzia de cale si siat eletore.

12. In su casu chi si fatzat proposta de atzione de averiguamentu in sea giurisditzionale, su tèrmine de deghe dies prevìdidu dae su comma 7 decurrit dae sa data de notificatzione de su ricursu.

13. Su consigieri regionale chi atzetet sa càrriga de assessore regionale decadit dae cussa de consigieri.

Art. 27



Àteros casos de incumpatibilidade

1. Ultres a sos casos prevìdidos dae s'artìculu 26, non podent pigare sa càrriga de Presidente de sa Regione, assessore regionale, consigèri regionale, sos sugetos chi detèngiant, in cunforma a su Còdighe Tzivile, a manera dereta o indireta, su controllu o sa proprietade de sotziedades pro atziones cuotadas in mercados regulamentados, e finas de sotziedades chi apant un'influèntzia de importu in sa proprietade o in sa gestione de una o prus retzas radiotelevisivas o de unu o prus cuotidianos o periòdicos a difusione natzionale o regionale, sarva s'istìpula de unu negòtziu fidutziàriu cun sas caraterìsticas indicadas chi sighint dae inoghe a in antis.
2. Cun su negòtziu fidutziàriu, su sugetu (dae inoghe a in antis s'istipulante) trasferit totu sos deretos e sos privilègios connessos a sas atziones a unu sugetu tertzu (dae inoghe a in antis su fidutziàriu), su cale achistat, gosi, su controllu e sa disponibilidade de sas atziones matessi. Est proibidu a manera espressa a su fidutziàriu de protzedire, in cale si siat momentu, a s'alienatzione, divisione, ipoteca, bèndida o modìfica sustantziale de sas atziones.
3. S'acordu est istipuladu finas dae sa sotziedade cun s'iscopu sìncheru de leare visione de sas restritzione impostas a s'istipulante e a su fidutziàriu pro su chi atenet sa cuncàmbia de informatziones subra s'atividade e s'andamentu de sa sotziedade.
4. Sa nòmina de su fidutziàriu est sugeta a s'aprovatzione de sa Consulta de garantia de sa cale a s'artìculu 34.
5. S'istipulante depet dare esecutzione a totu sas iniciativas e protzeduras netzessàrias a su fidutziàriu pro s'esertzìtziu cumpletu e curretu de totu sos deretos e privilègios connessos a sas atziones, cun s'osservàntzia de sos tèrmines e de sas cunditzione indicadas dae como a in antis:
 - a) s'istipulante depet operare cantu est netzessàriu pro fàghere a manera chi su fidutziàriu siat eletu comente consigèri de amministratzione de sa sotziedade;



- b) su fidutzìariu depet esertzitare totu sos deretos e sos privilègios connessos a sas atziones sena perunu cussìgiu, diretiva o istrutzione de s'istipulante;
- c) su fidutzìariu tenet, ultres a sos deretos e doveres normales de su consigieri de amministratzione, sa responsabilidade fidutzìaria e su dovere de agire in s'interessu de s'istipulante in calidade de atzionista de controllu o proprietàriu de sa sotziedade;
- d) pro totu sa dura de s'acordu s'istipulante non podet frunire a su fidutzìariu, nen su fidutzìariu podet pedire a s'istipulante, a manera dereta o indereta, cussìgiu perunu, diretiva o istrutzione subra s'amministratzione de sas atziones o de sos benes o de sas operatziones de sa sotziedade;
- e) sarvu sas etzetziones de custa litera e de sa litera f), pro totu sa dura de s'acordu su fidutzìariu non podet iscobiare a s'istipulante o a cale si siat sugetu chi òperet in rapresentàntzia sua informatzione peruna in relata a operatziones de sa sotziedade o a cale si siat transatzione chi pertocat a sos benes suos printzipiada o congruida dae su fidutzìariu matessi, o dae issu proposta; su fidutzìariu podet frunire a s'istipulante sas informatziones netzessàrias pro sa compilatzione e su pagamentu de sas tassas; podet, in prus, frunire a issu sos bilàntzios anuales e totu cussas àteras relatziones integrativas, apretziadas comente apropiadas dae sa Consulta de garantia, a manera de cunsentire a issu de cumprèndere bene s'andamentu de sa sotziedade in sos dòighi meses pretzedentes; sas partes a manera espresa previdint e reconnoschent chi su fidutzìariu no incurrat in responsabilidade peruna, ultres a cussa de amministradore, pro cale si siat pèrdida o diminutzione de valore de sas atziones o de sos benes de sa sotziedade in resone de su ligàmene fidutzìariu chi esistit in sos lìmities in sos cales fatzat atziones in fide bona e cun giudìtziu achistiadu;
- f) si in casu mai in s'interi chi durat s'acordu si verìfichet un'eventu sotzietàriu istraordinàriu a tretu de intzìdere o pregiudicare a manera grave s'integritade matessi de sos benes de s'istipulante, su fidutzìariu si podet consultare cun s'istipulante e retzire cussìgios, diretivas o istrutziones o s'istipulante matessi podet intervènnere de pessone pro esertzitare sos deretos e privilègios ligados a sos benes subratzitados petzi pustis chi at informadu sa Consulta de garantia e nd'est istadu autorizadu;
- g) s'acordu abarrat in vigèntzia finas a cando a s'istipulante benit rechestu de s'uniformare a custa lege;



- h) si in casu mai su fidutzìariu detzidat de renunziare a s'incàrrigu o li lompat una rechesta in custu sensu dae s'istipulante, custu ùrtimu nde podet nominare un'àteru, sugetu a aprovatzione dae parte de sa Consulta de garantia; sa nòmina no at efetu finas a cando su fidutzìariu chi essit no apat torrada sos contos a cussu chi intrat;
- i) in casu de morte, interdizione, inhabilitazione o nòmina de un'amministradore de amparu de su fidutzìariu, s'istipulante podet nominare unu sostitutu, sugetu a aprovatzione dae parte de sa Consulta de garantia, chi esèrtzitat sos deretos e sos privilegios assotziados a sas atziones;
- l) in casu de morte, interdizione, inhabilitazione o nòmina de un'amministradore de amparu de s'istipulante, su fidutzìariu depet assignare e torrare a trasferire sos deretos e sos privilegios assotziados a sas atziones a sa pessone chi rapresentet totu sos interessos de s'istipulante, fata chi siat sa dimostrazione oportuna de custa calidade;
- m) su fidutzìariu atzetat su mandadu gasi comentu delineadu in sos tèrmines e in sas condiziones chi disciplinant s'acordu.

Art. 28

Proibitziones contratuales

1. In sa vigèntzia de s'acordu de su cale a s'artìculu 27, sa sotziedade non podet istipulare cuntratos o acordos noos cun s'Amministratzione regionale o agenzias, aziendas o entes regionales, non los podet rennoare o perlongare, sarvu chi siant agiudicados tràmite gara pùblica o àtera protzedura a evidèntzia pùblica.
2. Sos disponimentos de sos cales a s'artìculu 27 s'aplicant finas a cussos chi detenent una partetzipazione in una sotziedade cuotada, in sa misura cun sa cale issa siat apretziada dae sa Consulta de garantia a tretu de influentzare s'acumprimentu curretu de sos doveres de Presidente de sa Regione, assessore, consigieri regionale, e finas a cussos chi, a manera dereta o indereta, esèrtzitent atividades sugetas a emissione preventiva de cuntzessione amministrativa regionale o cun unu faturadu prus mannu de 100 milliones de èuros.



Art. 29

Cunflitu de interessos

1. B'at unu cunflitu de interessos in totu sos casos in sos cales esistat unu cunflitu intre sos doveres pùblicos de su Presidente de sa Regione, de sos cumponentes de sa Giunta regionale o de sos consigeris regionales e un'interessu privadu e/o personale issoro a tretu de influentzare s'acumprimentu curretu de sos doveres e responsabilidades pùblicas issoro o de produire a vantàgiu issoro efetos diversos dae cuddos chi pertocant a ogni àteru sugetu chi appartenet a sa Giunta regionale o a su Consìgiu regionale.
2. Nemos de sos sugetos de sos cales a su comma 1 podet espressare su votu suo subra cale si siat proposta de lege, de regulamentu, de deliberatzione amministrativa, rispetu a sa cale iscat o depat ischire de èssere in cunflitu de interessos.

Cabu VII

Consìgiu de sas autonomias locales

Art. 30

Consìgiu de sas autonomias locales

1. Su Consìgiu de sas autonomias locales est s'òrganu de rapresentàntzia istituzionale de sos entes locales cun funtziones consultivas e de proposta.
2. Su Consìgiu de sas autonomias locales podet propònnere a sa Giunta regionale de promòvere giuditziu in dae in antis a sa Corte Costituzionale subra atos de s'istadu chi s'aprètziat lesivos de s'autonomia de sas comunas e de sas provìntzias de Sardigna.
3. Sa lege regionale disciplinat poderes e cumposizione de su Consìgiu de sas autonomias locales.



Titulu V

Fontes

Art. 31

Calidade normativa

1. S'atividade legislativa e regulamentare de su Consìgiu regionale si cunformat a sos printzìpios chi s'inghiant : crasesa, simplesa de formulatzione, omogeneidade de sos contenidos, respetu de sas règulas de tècnica legislativa e de calidade de sa normatzione, semplicitatzione de su sistema normativu, coerèntzia e eficatzidade cara a sos obietivos de cunsighire. Su Consìgiu regionale assegurat sa calidade de sa normatzione finas tràmite s'anàlisi de impatu, s'anàlisi de fatibildade e sa valutatzione de s'atuatzione de sas leges e aprontat sos istrumentos e sas mesuras organizativas netzessàrios.
2. Sa Regione assegurat una completa e ativa comunicatzione de sos atos normativos a fines de nde garantire sa connoschèntzia.

Art. 32

Protzedimentu legislativu

1. S'initiativa legislativa apartenet a cadaunu de sos consigeris regionales, a sa Giunta regionale e a su pòpulu; s'esèrtzitat cun sa presentatzione de progetos redatzionados in artìculos e acumpangiados dae una relata de incarimentu.
2. Sos progetos de iniziativa popolare depent èssere sutascritos dae nessi deghe mìa eletores de sa Regione.



3. Sas initziativas populares sunt deliberadas in bia definitiva dae su Consìgiu regionale intro duos annos dae sa presentazione issoro. Non sunt sugetas a decadèntzia cando acabat sa legisladura.

4. S'initiativa legislativa popolare no est ammittida pro sas leges tributàrias e de bilàntziu, in matèria de provvedimenti chi pertocant dessinnatziones o nòminas e non podet èssere esertzitada in sos ses meses antezedentes a s'iscadèntzia de su Consìgiu regionale.

5. Ogni progetu de lege est esaminadu dae sa Commissione cumpetente e aprovalu dae su Consìgiu regionale artìculu pro artìculu e cun votu finale.

6. Su Regulamentu internu de su Consìgiu regionale previdit protzedimentos abbreviados pro s'aprovu de progetos de lege urgentes. Custos protzedimentos non sunt ammittidos pro s'aprovu de sas leges de bilàntziu e de sas leges istatutàrias.

7. In sos protzedimentos chi pertocant sa formatzione de sas leges e de sos atos generales de programmatzione, su Regulamentu internu disciplinat sa consultazione de assòtzios, comitados e grupos de tzitadinos rapresentantes de interessos colletivos.

Art 33

Testos ùnicos

1. Su Consìgiu regionale podet delegare cun lege sa Giunta a redatzionare testos ùnicos de riòrdinu e semplificatzione de sa normativa in vigèntzia finas tràmite abrogatzione de sas leges chi giai esistint. Sa lege de dèlega detèrminat sos tempos, sos critèrios e s'àmbitu de su riòrdinu pro setores orgànicos de matèrias.

2. Sa Giunta, in su tèrmine assegnadu, presentat su testu ùnicu a su Consìgiu chi l'aprovat cun sas protzeduras abbreviadas previstas dae su Regulamentu internu.



3. Sos testos ùnicos podent èssere abrogados o modificados, finas a manera partziale, petzi a moda espresa.

Titulu VI

Òrganos de garantzia

Cabu I

Consulta de garantzia

Art. 34

Consulta de garantzia

1. Sa Consulta de garantzia est cumposta dae tres componentes de sos cales duos eletos, in su rispetu de su printzìpiu de sa rapresentàntzia paritària de sos gèneres, dae su Consìgiu regionale a majoria de su de tres duos de sos componentes; si in casu mai a pustis de sos primos duos iscrutinios non si lompat su quorum rechèdidu, dae su de tres turnos si protzedet a votazione cun votu limitadu; resurtant eletos sos duos prus votados. Su Consìgiu de sas autonomias locales nòminat unu componente cun sas modalidades prevìdidas pro su Consìgiu regionale. Sos componentes de sa Consulta sunt seberados intre sos magistrados, intre cussos a riposu puru, de sas giurisditziones ordinària, amministrativa e contàbile, intre sos professores universitàrios ordinàrios in matèrias giurìdicas e intre sos abogados cun nessi bìnighi annos de esertzìtziu efetivu de sa professione.

2. Sa Consulta tenet sa sea in su Consìgiu regionale. Abarrat in càrriga ses annos e sos componentes non podent èssere torrados a elègere.

3. Sos componentes de sa Consulta de garantzia non podent leare o mantènnere àteros impiegos pùblicos o privados, ne esertzitare atividades professionali, commertziales o industriales, funtziones de amministradore o sìndigu in sotziedades chi apant fines de lucru.



4. Sa Consulta eleget intre sos cumponentes suos su Presidente, chi durat in càrriga tres annos e non si podet torrare a elègere.

5. Sa lege regionale assegurat a sa Consulta autonomia regulamentare, organizzativa e amministrativa e detat disponimentos ulteriores chi pertocant a sa costituzione e a su funtzionamentu suo.

Art. 35

Funtziones

1. Sa Consulta de garantia est òrganu indipendente de sa Regione, cun funtziones consultivas e de garantia.

In particolare:

- a) espressat parre subra sa cunformidade a s'Istatutu ispetziale e a custa lege de sas delìberas legislativas, in antis de sa promulgatzione issoro, si in casu mai nde fatzat rechesta su tres unu de sos cumponentes de su Consìgiu regionale, su Presidente de sa Regione o su Consìgiu de sas autonomias locales; in casu de parre negativu sa delibera est rinviada a su Consìgiu regionale pro èssere torrada a esaminare;
- b) espressat, in antis de s'emanatzione issoro, parre obligatòriu subra sa legitimidade de sos regulamentos, cando lu rechedat su de tres unu de sos cumponentes de su Consìgiu regionale, su Presidente de sa Regione o su Consìgiu de sas autonomias locales, in casu de parre de illegitimidade, su regulamentu est rinviadu a s'òrganu chi at deliberadu, chi lu podet torra adotare motivende•lu;
- c) espressat parre subra sos cunflitos de cumpetèntzia intre sos òrganos de sa Regione, subra rechesta de unu de sos òrganos interessados a su cunflitu;
- d) detzidet subra sa regularidade e subra s'ammissibilitade de sas propostas de iniziativa legislativa popolare e de sos referendum;
- e) cuntestat a sos cumponentes de sa Giunta sas càusas de incumpatibilitade e detzidet subra de custas in cunforma a s'artìculu 26;
- f) detzidet subra de sa sussistèntzia de sas càusas de incumpatibilitade previstas dae sos artìculos 27 e 28 pro su Presidente, sos consigeris e sos



assessores e esèrtzitat sos poderes e adotat sos atos prevididos dae sos artìculos matessi.

g) deccrarat sa sussistèntzia de s'impedimentu permanente de su Presidente de sa Regione.

Tìtulu VII

Disponimentos transitòrios

Art. 36

Referendum: disciplina aplicàbile

1. Finas a s'aprovu de una lege regionale noa, in matèria de referendum sighit a s'aplicare, in cantu cumpatibile cun su cabu II de su tìtulu I, sa lege regionale 17 maju 1957 n°20 (Normas in matèria de referendum popolare regionale) e modificatziones imbenientes.

Art. 37

Disponimentos in matèria elettorale

1. Finas a s'intrada in vigèntzia de sa lege elettorale previdida dae s'artìculu 10, comma 1, sighint a s'aplicare sos disponimentos de sos cales a s'artìculu 3, comma 3, de sa lege costituzionale 31 ghennàrgiu 2001, n°2 (Disponimentos chi atenant s'elezione de sos Presidentes de sas regiones a istatutu ispetziale e de sas provìntzias autònomas de Trentu e Boltzanu).

Art. 38

Eficatzidade de sas normas in matèria de inelegibilidade e incumpatibilidade

1. Sos disponimentos de sos cales a sos artìculos 24, 25, 26 s'aplicant dae sas eleziones regionales imbenientes a s'intrada in vigèntzia de custa lege.



2. Pro sas primas eletziones imbenientes a s'intrada in vigèntzia de custa lege, sas conditziones de inelegibilidade depent semper e cando èssere rimòvidas in sos tèrmines previstos dae sos artìculos 24 e 25.
3. Pro sa legisladura in cursu s'aplicant sas incumpatibilidades prevididas dae s'artìculu 17 de s'Istatutu ispetziale.
4. Sos disponimentos de sos cales a sos artìculos 27 e 28 s'aplicant a decùrrere dae s'Istituzione de sa Consulta de garantzia de sa cale a s'artìculu 34. Cun lege sunt disciplinados sos casos in ogetu e sos acumprimentos pro sos casos de cunflitu de interessu de sos cales a s'artìculu 29.